

完縣新志

傅增湘題



完縣文徵下

唐代

木蘭歌

韋元甫

木蘭抱杼嗟借問復爲誰欲聞所憾憾感激彊其頤
老父隸兵籍氣力日衰耗豈足萬里行有子復尙少
平沙沒馬足朔風裂人膚老父舊羸病何以彊自扶
木蘭代父去秣馬備戎行易却紈綺裳洗却鉛粉粧
馳馬赴軍幙慷慨携干將朝屯雪山下暮宿青海旁
夜襲燕支氏更携子闐羗將軍得勝歸士卒還故鄉
父母見木蘭喜極成悲傷木蘭能承父母顏卸却巾
韉理絲簧昔爲烈士雄今爲嬌子容親戚持酒賀父
母始知生女與男同門前舊軍都十年共崎嶇本結
弟兄交死戰誓不渝今者見木蘭音聲雖是顏貌殊
驚愕不敢前嘆息徒嘻吁世有臣子心能如木蘭節
忠孝兩不渝千古之名焉可滅

木蘭詞

無名氏

唧唧復唧唧木蘭當戶織不聞機杼聲惟聞女嘆息
問女何所思問女何所憶女亦無所

思女亦無所憶昨夜見軍帖可汗大點兵軍書十二卷卷卷有爺名阿爺無大兒木蘭無
長兄願爲市鞍馬從此替爺征東市買駿馬西市買鞍韉南市買轡頭北市買長鞭旦辭
爺娘去暮宿黃河邊不聞爺娘喚女聲但聞黃河水鳴濺濺旦辭黃河去暮至黑山頭
不聞爺娘喚女聲但聞燕山鐵騎鳴啾啾萬里赴戎機關山度若飛朔氣傳金柝寒光照
鎧衣將軍百戰死壯士十年歸歸來見天子天子坐明堂策勛十二轉賞賜百千鏹可汗
問所欲木蘭不用尙書郎願借明駝千里足送兒還故鄉爺娘聞女來出郭相扶將阿妹
聞姊來當戶理紅粧小弟聞姊來磨刀霍霍向豬羊開我東閣門坐我西間牀脫我戰時
袍着我舊時裳當窗理雲鬢對鏡貼花黃出門看火伴火伴始驚惶同行十二年不知木
蘭是女郎雄兔脚撲朔雌兔眼迷離雙兔傍地走安能辨我是雄雌

以上
舊志

明代

輓段棗強歌

段棗強
見人物

知縣杜珮

段棗強段棗強石爲膽鐵作腸今年盜賊起郡縣皆倉皇妻子被淫劫廬舍被焚戕不意

聖朝寧謚久突遭此變城堪傷公乃憤然不惜命立志但欲扶綱常孤忠烈烈薄雲漢巡
遠之事堪頡頏可笑無能屏者徒聞風奔走無邊方睦然亦負丈夫軀好施鉛粉學紅粧
太平天子懸高鑑儒者罪之忠者揚褒爾爾兮官爾後遣使諭祭何芬芳天語叮嚀賁幽
局太史大筆書行藏人生一死固足惜如公之死誠何妨憶我少年讀書史每逢忠義心
激昂今亦委質食君祿瀕危寧敢計存亡倘若一死得其所願與段公同翱翔

講堂寺

御史孫 慎

風色蕭蕭客倦行萬山迴合一鐘鳴到來幽谷塵心靜聽解高僧梵語清天漢微流雲欲
散上方倒影月初明年來漸覺浮生夢願學河顚物外情

又

參將馮 登

空山一任野人行花自開時鳥自鳴問寺不嫌石徑窄入門偏見老僧清禪從靜裏依稀
見月過峯頭分外明此夜共君談密意了知無物可繫情

木蘭歌 有引

寺丞東吳姚奎

予讀古樂府木蘭辭常發一哂惡有女子從戎十二年所向克敵封尚書郎耶嘉靖戊子冬十月予閱馬政重過完邑憩城東古廟中扁曰漢孝烈將軍木蘭神祠拂古碑讀一過矍然嘆曰有是哉牧之真不我誣也孝女姓魏氏字木蘭父名應漢文帝時單于侵境大括民兵女父與焉父嘆曰恨不生兒乃自從戎孝女感奮即于閨中洗鉛華脫簪珥變戎衣跨鞍執銳代父行役一往十有二稔寧旗斬馘上功幕府奏凱還封尚書郎賜金紫孝女懇辭乞歸終養漢帝嘉之表門閭唐封爲孝烈將軍又考雜記孝女亳州人戍於完懋著克敵功因有廟焉嗟乎委身事君忠也克敵制勝勇也辭封拒賞廉也事親終身孝也久處戎役守身弗失貞也五德具焉烈丈夫猶難一女子能之不亦可嘉乎哉建廟崇奉享祀千秋宜矣予作續木蘭歌大書鐫石將以勸天下後世之爲臣子者歌曰常讀木蘭詞未知木蘭女完城東有廟廟貌綽雄偉予因閱馬政匆匆一蒞止拂塵讀古碑歷歷見終始木蘭雖女身振古奇男子洗粧冒鐵衣代父充邊戍朝辭亳州村暮宿黃河涘操戈在燕山星霜週一紀首功上幕府捷聞天子喜乃封尚書郎乃賜衣金紫孝女拜謝辭懇

乞歸鄉里甘旨奉二親志願亦酌矣孝烈與忠正古今誰足擬報德報豐功崇奉綿千祀
堂堂英雄氣雖死猶不死寒予作短歌大書揭檻宇鬚眉多婦人鑒此顏應泚
西峪庵

通政梁見孟

丹崖繡壁倚雲開蕭瑟秋風萬壑迴葉落自隨流水去不知身世在天臺

又

銓揆陳 采

高峯疊嶂入青天石磴峻嶒鳥道盤鬼斧何時開赤壁神龍常自護清泉猿啼古木秋悽
只鶴唳長松夜黯然爲愛好山歸不得還期採藥訪神仙

又

計部田一井

獨蕭丹岩上鳥穿紅樹中泠泠石澗水流向大河東

以上舊志

古曲逆

張 勛

此地曾聞比洛陽荒原景色曉蒼蒼白登舊事傳黎老六出奇踪作牧場雉堞空餘禾黍
秀宮垣盡付野花香登高縱目情何限煙柳依稀遶故堂

不二庵

銓揆陳 采

荒山蕭寺暮雲浮落日寒生空谷秋僧舍無人暝色淨祇園深處鳥聲幽鐘來上界開清梵風入長松送客愁夜坐佛燈談半偈一天霜露洒松楸

青龍神祠

縣人田如式

萬朵芙蓉引翠屏層巒深處起天庭浪噴西嶺銀河落月出東山玉燭生洞口桃花因煖笑雲邊吟雁爲寒征茫茫有象歸無象颯颯香風繞帝京

木蘭祠賽神曲

有引

知縣何出光

何子曰余蓋讀木蘭詞有餘慨焉不謂其祠于完完之祠將軍也偉矣將軍毫人魏氏女漢文帝時老上寇邊帝親征大括民兵迨可空國將軍以父老不任授甲身僞丈夫子以行轉戰燕山前後十有二年奏凱策勛當受上賞乃辭官就養以簪珥見儕輩衆驚走相顧始知其女子也完爲古曲逆當燕山之麓將軍百戰收其地土人廟祀之至唐封以孝烈夫曲逆固陳侯邑今當有遺址在而民未有廟陳侯者此其故可想已獨怪今材官基

布疆場豈不自具鬚眉乃功可廟食累世不得一焉媿將軍矣將軍廟貌嚴整歲伏臘脩

祀事唯謹顧升歌者多侏離語藝矣何子製賽神曲十有二闋冀將軍聽之且以風世

漢家事業拓雄圖勇健嬌嬌媿丈夫揮槩當關百戰後堂堂正氣至今無其一

玉臂朱顏逐寒塵貔貅隊裏度青春十年不卸將軍鎧萬死猶存淑女身其二

機杼纔拋習鼓笳雙娥不展望塵沙金戈鍊馬三千里凱奏歌聲入漢家其三

揮鞭逐北入黃雲夜著鎡衣駐雁群不是凱旋重對鏡至今誰識女將軍其四

萬死從軍十載餘投戈下馬拜庭除功成不受明堂賞肯學緹縈自上書其五

漫將孝烈等曹娥誓死何須蹈素波况是凱旋十載後堂前小弟已婆娑其六

范郎城下破重圍刁斗風傳塞雁飛但有將軍守上塞何勞烈女送寒衣其七

關弓飛騎黑山頭曲逆曾經百勝收縱使白登圍已解羞將美女覓封侯其八

漢將功高屬女郎和戎何又出紅粧琵琶有恨流千古青塚終無俠骨香其九

千古荒祠蒲水西九秋殺氣塞雲齊敵人膽落燕山外不向長安放馬嘶其十

關塞防秋自古今太平忽厭鼓聲音獨憐孝烈祠邊月夜夜猶懸報國心

其一十

風雨依稀見羽旂雲霞彷彿議征衣將軍莫繫邊關恨今日燕山是帝畿

其二十

石獅洞

銓揆陳 采

洞門高敞半天開聞有神仙跨鶴來尸解已歸三島去尙遺道骨寄雲隈

又

通政梁見孟

百尺丹梯上憑虛結構牢鐵梁懸絕壁棧木架危橋拂檻白雲入凌峰紫氣遙恍疑塵世外對鶴坐空霄

又

知縣張保民

窈窕縈紆鎖翠崖幽深虛敞絕塵埃藥爐晝永煙消火碁局年深雨長苔流水一溪芳草秀香風幾樹碧桃開月明午夜笙歌响疑是神仙跨鶴來

以上舊志

清代

重修敬一亭歌

教諭黃

錦

大名元城人

敬一亭荒動客愁敗瓦殘石堆爲邱兩積時時生荊棘月黑往往鳴鶴鷗程子四箴埋深
土嘉靖玉碑石欲流我來曲逆已四載自慙綿力難重修每撫遺址輒慨然感今追昔徒
嗽嗽忽來邑侯性偶儻修舉廢墜百務周捐金鳩工復事此一月落成工告休朴素不肯
事華侈軒爽却堪作勝遊池內菱荷映簷楹城外山色望中收覆庇衆碑永無虞嗣緝還
望同心儔君不見滕王閣黃鶴樓巍然畫棟大江頭歲久不修輒傾落土木之工安能一
成即歷幾千秋嗟乎土木之工安能一成即歷幾千秋

敬一亭

董廷搢

明倫堂背新亭子邑宰書題司鐸文述作古今同一致低徊興廢等閒分雙丸雉影參差
見數畝荷香遠近聞我爲納涼憑一囑西山依舊送晴雲

石獅洞

董廷搢

紫府清都異昔居孤虹斷澗苦趑趄洞封蘿薜虬龍隱霧散崔嵬虎豹除七日頓歸輕解
帶百年甕死惜飛魚果然煉蛻能朝帝便謫人間也自如

又

田攀龍

石洞紅塵遠危崖太始幽鐵橋通削壁丹竈傍松楸羽化飛雲鳥詮忘泛鶴洲夜來仙術妙移運在峰頭

雨後敬一亭遠眺

田錫祐

雨餘曉氣涼野水積斷岸高亭恣遐矚欣賞復忘倦倏忽薰風來荷香襲衣畔煩暑既消歇詩思亦蕭散閒鷗戲清流煙雲正迷漫酌酒發高歌隔坐銀箏按憶昔芻牧場遊履今不斷洛陽賢父母風流千古擅

敬一亭雅集

前人

碑斷亭荒委落塵憑欄眼界一時新偶來主敬明倫地想見興衰起廢人水色山光留妙諦花香鳥語帶天真多情爲愛嚶鳴侶漏滴猶聞嘯咏頻

又

前人

忘心易勝敬心微大哉王言闡奧旨世遠年湮風雨搖古亭半付荒煙裏殘碑欲識字模

糊憑弔遺跡嘆未止我侯琴鶴自洛陽文穆家聲忽崛起下車數月政通和輿廢舉衰心
不已鄉賢祠宇如翬飛節義牌坊塗丹紫今復捐金構此亭高廠虛明殊可喜蘇湖先生
意興豪盛暑督修汗欲滴極目亭中四望賒水色山光散霞綺倏忽薰風自南來綽約荷
花新出水隔浦小洲立雙鳬斜汀淺渚滿香芷憶昔歐陽記醉翁奚若我侯亭獨歸振興
文教世所稀老鷺亦爲悲鳴起安得秋風振羽毛從茲扶搖搏萬里

又

郭良輔

幾度風霜亭址湮神君鶴俸頓時新重昭聖訓垂千古再理王言啓後人菡萏香中堪澡
德風塵息處可寄身但將志學爲遊意自覺層軒別有春

堯城

田錫祐

山川佳處慶雲翔野老相傳是帝鄉一息一休風尚古無虞無詐俗猶龐伊耆洞口苔痕
細唐帝祠前樹色涼謾道芳徽難再觀中天日月又重光
敬一亭夏日遠眺

趙廷輔

夏日尋芳敬一亭滿塘紅粉映疏櫺南彎曲水束金帶北拱祁山列畫屏程子四箴垂石壁將軍孤墓勒碑銘危欄半落青雲外今日登臨可摘星

蓮花池

知縣呂守曾

河南新安人

積水成隅十畝塘芙蕖徧種擬河陽漁舟知近將軍墓遊展應窺夫子墻曉露葉間垂綠雨晚風花底逗清香即今芹藻同輝映太液還期吐異芳

又

謝斐

浙江山陰人

聞說芙蕖開滿塘栽成花縣勝河陽碧聯泮水千層藻紅映櫺星數仞墻露潤常沾仙令澤風清猶帶木蘭香歸時擬泛扁舟去傾聽蓮歌共采芳

又

蓮池今夏盛燕平蒲水應傳花縣名心愛不惟周茂叔絃歌何必魯諸生栽成君子長留種香繞宮墻遠益清佇看藕花數十里薰風載出讀書聲

雨中賞蓮

傅鵬

雨潤荷花朵朵鮮紅芳香氣正堪憐紅薰激豔疑燒地香徹煙雲欲噴天騷客廣搜摸鏡
句真儒別賦洗心篇濃華儘有不他及信是濂溪只愛蓮

又

田錫祐

雨潤荷花朵朵鮮逍遙亭畔碧雲連鶯穿柳線隱還現珠滿荷盤碎復圓鬧裏偏尋塵外
味忙時獨寫靜中天世人不識堯夫意道趣徒然著眼前

又

張崇文

雨潤荷花朵朵鮮閒從杖履坐溪泉池邊香裊蓮心淨柳際煙凝燕影偏結社行吟方外
友依花作幕吏中仙晚來更有尋幽興碧枕清樽泛小船

蓮花池

董廷摺

城隅塲水一菱菱報道芙蕖開正研褪淺粉房湄白露香平翠蓋倚青天出花羣鷺高鳴
玉藏葉新龜穩貼錢落日不堪留客醉好邀明月再來眠

又

趙廷輔

誰人太液洒青錢掩映新開解語蓮水鳥貪花飛又止金鱗遊鏡去仍還碧連芹藻蛟龍起光射宮牆桃李妍賦罷池頭歸去晚薰風輕送木蘭船

又

趙璫

將軍忠孝兩雙全墓畔因栽十頃蓮葉出傘遮江底月花繁錦砌水中天潘妃舉步留金蕊君子清香送畫船一片朱華嬌欲語江南江北讓茲妍

木蘭祠

訓導平襄

順天大興人

畫棟依城曲巍然孝女祠從軍全父志奏凱避人知日向青山落陵隨滄海移英靈獨不泯朗誦木蘭詩

又

董廷摺

誰云生女不如男萬里從軍一力擔柔質幾曾沾重祿大名今且壯雄談朱扉日月如重鑠森木干戈比舊探忠孝可憐巾幗具忍使鬚眉對影慙

又

王淑

閨閣英奇亦有傳獨君代父把征鞭遠依寒月三千里一著戎衣十二年陷陣洵洵強寇
畏歸家藹藹暮親憐如來說法無遺相若恨閨身恐未全

又

趙新畿

功成歸國謁君王賞賜百千出上方行役微勞何足道策勳高爵敢相當鐵衣有色霜華
淨寶劍無塵月影涼欲壽雙親何所獻惟將本體付高堂

又

呂法曾

河南癸巳舉人

徙倚荒祠古樹旁東流曲水自湯湯城邊日射熊旗影天際星搖寶劍光直到回時驚火
伴知從去日謝花黃祇今閭里崇禋祀千古英雄一女郎

祭名宦祠左忠毅公文

縣人田錫祐

貢士

惟公鍾靈川嶽毓秀名邦學宗濂洛文步王唐正大參乎天地義烈振乎綱常筆掃千軍
早折雲霄之桂胸羅萬象旋擷上苑之香向薇垣而曳履依日月以騰光遂乃忠結帝眷
寵命頻將披繡衣而課士煥雲漢之天章斯文何幸仰遇狄梁備參苓於藥籠空冀北之

驪黃抑且長才不羈大任堪當豈直齊乎汲黯風度並乎曲江錫元圭於禹甸普水利於
八方此既歌乎滯穗彼復慶乎倉箱孰意宏猷甫著奄勢忽張痛豺狼之當道噪鳴鳳於
朝陽笏擊賊臣之額血濺侍中之裳由是從容就義含笑雲鄉貽孫謀以燕翼慶忠孝之
孔昌恭逢父母蒞我山疆琴彈單父花種河陽同中牟之報最效清獻之焚香桑麻遍於
四野禮樂興乎一堂元知世德丕茂聖眷方長金昆玉友皇路騰驤觀蒼生之有慶霑霖
雨以無方茲者敬涓吉日祀主是康忠耿可慕頻壁生光祐等虔陳俎豆用荐芬芳庶鑒
微忱來格來嘗尙饗

德安山寺

金經

梵王宮畔多題咏愧我行吟無好思他年若得紗籠壁攬轡重來改舊詩

又

田錫祐

無邊風月憑人咏不盡活機任我思富貴皆同身外物留芳豈在壁籠詩

下叔橋

田瑗